

BINTANG BUHA SIANG

"Ahu, Jesus, marsuruh malekat-Hu bani nasiam, manaksihon on bani kuria in. Ahu do urat pakon marga ni si Daud, bintang buha siang na marsinalsal in."

Pangungkabon 22:16

Anggo isobut Jesus diri-Ni ijon Bintang Buha Siang na marsinalsal ai ma sada tanda banta paboa dunia pakon tanoh iananta nuan na ibagas hagolapan ope. Halani bintang marsinalsal pakon borngin na sadalan do ai. Itatap Tuhanta hun Nagori Atas dompak dunia on hagolapan ope manrungkup dunia on.

Tapi Jesus na boi manondangi in, sedo pitah sanggah borngin dihut do panorang buha siang (sogod). Ia do boi pasalpuhon borngin na golap in. Ia do na boi pasiangkon uhurta na golap in, na mambahen sejarah na baru ibagas dirinta marsada-sada. Panorang Advent ma nuan sidompakkononta. Panorang manjalo parroh ni Jesus na paliharhon uhurta. Pitah Ia do na boi pasalpuhon kuasa ni hagolapan ai ibagas dirinta. Atap sonaha pe hagolapan na manrajai dunia on, boi do on ipalihar Tuhan Jesus ai ganup. Jesus sandiri do na patugahkon ai banta, patut jaloonta ai. Bagei do na pagolpahon pardomuanta pakon Naibata, sonai homa na pagolpahon mata ni i partonduyonta ase ulang ididah hita na binahen ni Tuhan in banta, tapi gogohan ope Jesus na marsinalsal in.

Jongjong do hita bani panorang on ibagas bonani tahun kuria na baru. Golap do pambotohta pasal ari na laho roh, tapi age pe sonai lang pala mabiar hita, ai domma taridah sinondang ni Tuhanta Jesus, sinondang ni Bintang Buha Siang na marsinalsal. Mardalan ma hita ibagas haliharon na humbani Tuhanta, lao mangalo-alo ari Pesta Partubuh ni Tuhanta, lao manjalo bagah-bagah-Ni, lao manjalo hata hagoluan na humbani Tuhanta. Lang ra miloh sinondang ni Bintang na dob poltak in, janah sonai do homa haliharon na das hubanta, sai totap do.

Patut ijalo hita ai, ai dihut age uhurta boi ipasiang, sonai pakon langkahta pe. Marhasomankon sondang haliharon ni Bintang Buha Siang ari, boi hita mardalan ibagas uhur na liar. Golap hinan uhurta nin homa pambotohta, tapi dob manjalo Bintang Buha Siang, ai ma Jesus Tuhanta in liar ma haganupan.

Tonggo: *Ham Tuhan Jesus, Ham do hansa na boi paliharhon uhurnami na golap in, halani ai roh ma Ham bannami manondangi uhurnami. Amen.*

HALELUYA NO. 27:1+3

- | | |
|---|--|
| 1. Patahar ma horbangan in,
ai domma roh Rajanta in.
Sigomgom raja haganup,
sitobusjolma haganup.
Siboan hatuahon in
Paulak hasonangan in.
In pe na puji ma
Tuhanta Naibata. | 3. Martuah do nagori in,
dob ijalohon Raja in;
Uhurta pe sai sonang do
dob masuk Raja in na roh
Lihar tumang uhurta in,
dob roh panondang in hujin
In pe na puji ma
Tuhanta Naibata |
|---|--|

AMEN! HALELUYA!

“Napuji ma Jahowa, Naibata ni Israel, humbani sadokah ni dokahni, ronsi sadokah ni dokahni, anjaha haganup ma bangsa mangkatahon: Amen! Haleluya!”

Psalmen 106:48

Lang adong boi hatahononta lang mamuji Tuhan Jahowa hita bani sada panorang na pondok atap tongkin gelah, halani ganup panorang do marisi idop ni uhur ni Jahowa. Humbani detik parmulaan das hu detik parpudi ni goluhta totap do ibagas idop ni uhur ni Jahowa. Apalagi anggo ibilangi hita ganup dousanta dompak Naibata, hape lang mintor ipadalan Naibata uhuman banta, ai lang idop ni uhur ni Naibata na tarlobih ai do mambaen lang magou hita? Sonai do idingati bangsa ni Naibata sagala pambahenan ni sidea na dob in, panlanggaron ni ronsi hajahaton ni na lobei ni sidea, gabe iakuhon ma halani idop ni uhur ni Tuhan mando ase, maluah sidea. Roh ma use pangakuan ni sidea lao mamuji Naibata!

Anggo domma itanda hita idop ni uhur ni Naibata na mangidopi hita, ai lang patut ma pujionta tongtong Tuhanta? Mamuji Tuhan marhiteihon ni kebaktianta, pambahenanta ronsi goluhta tene! Artini ai, sedo pitah ari Minggu hansa hita mamuji Tuhanta, seng pitah ari pesta atap panorang Pesta Natal tapi humbani sonari nari ronsi sadokah ni dokahni goluhta janah ronsi sadokah ni dokahni do. Haganupan bangsa do boi mamuji Tuhan in, mangkatahon: Amen! Haleluya! Ibagas Jesus Kristus do saud on. Ulang das hatadingan hita, lang boi dihut mamuji Tuhanta. Nuan do pasomal somalonta mamuji Tuhan in. Anggo domma holi das bani panorang paruhuman ai, tontu lang tarhatahon halak na so onga mamuji Tuhan in be hata puji-pujian: “Amen, Haleluya,” halani seng marurat hata ai bani uurni.

Anggo lang dihut hita mamuji Tuhanta sadokah ibagas goluhta on, tontu magira pe lang dihut hita mamuji Tuhanta. Amen, nai ma tongon; Haleluya, puji ma Jahowa! Sonai ma pangakuanta age sadari on, tarlobih lao mangalo alo Jesus Sipaluah in ibagas panorang Advent on!

Tonggo: *Ham Tuhan Naibata, pitah Ham do sipujionnami sadari on, patar pe, ronsi sadokah ni dokahni. Padihut Ham ma hanami magira rap pakon hasomannami na porsaya in i lobei-Mu mangkatahon: Amen! Haleluya! Amen.*

HALELUYA NO. 403:1-2

- | | |
|--|---|
| <p>1. Sai puji ma Tuhanta tongon,
na marmuduhon goluhta on.
Dodingkon ma goran-Ni tongtong
na manobus hita pardousa on
Amen, haleluya, sai puji
Tuhan Naibatanta na sangap in.</p> | <p>2. Seng dong songon-Si i tanoh on,
na mangurupi hita tongtong.
lhopkop do ganup hita on,
seng adong na tading humbanta
Amen, haleluya, sai puji
Tuhan Naibatanta na sangap in.</p> |
|--|---|

GALANGAN

“Mandalankon na madear ampa marsibere-bere, ulang ma halupahon nasiam ai, ai galangan na sonai do iharosuhkon Naibata.”

Heber 13:16

Marhitei na mambotoh harosuh ni Naibata, na botoh ma homa sonaha sikapta i lobei ni Naibata. Hotop do ihorjahon hita sada horja, hape lang nabotoh atap na mardomu ai atap lang bani Naibata, dobni hita pe sangsi do manghorjahon ai. Sipata na madear ma ninuhur sada horja i tengah-tengah ni kuria in, hape apala na marlawanan do ai bani paraturan na marlaku. Ra do homa laho mangurupi hasoman ninuhur, hape ai do na use paboratkonsi. Ase ulang masa sisonai ai dampak hasoman tarlobih dampak Tuhanta, porlu lobei botohon naha do harosuh-Ni.

Na hinarosuhkon ni Naibata ai ma galangan, galangan puji-pujian, na ginoran homa galangan buah ni bibir. In ma na sinobut: Galangan kebaktian. Galangan sisonon seng singgan i parmingguan hansa marlaku atap sanggah i partonggoan, tapi dihut do age marhitei goluh pakon horjanta siganup ari. Artini, galangan puji-pujian maningon do homa marpambahenan na taridah. Anjaha seng tarsirang na dua pahara on. Ase lang boi hape hatahononta sonon: Marminggu gelah dihut diri domma sungkup, anggo na mambangun Gareja atap mambayar hu kas idop ni uhur lang pala. Sonai do homa age sebalikni lang boi hatahononta: “Anggo dong na porlu sibangunon i Garejanta, atap guguan aha pe ai, ulang lupa nasiam managih ai humbangku, tapi anggo marminggu ulang pala loja nasiam mangarahkon ahu, nasiam ma ijin!”

Horja na madear do na mambere, sonai age na markebaktian, tapi ulang sada hansa na horjahon, tapi haduasi do ai! Ai do galangan na hinarosuhkon ni Tuhanta. Anggo sada do hansa nahorjahon, usih hubani na mambere duit na so laku do ai, na so margambar timbal balik, huja pe lang tarpadalan, gariada gabe sisangسیونkon use anggo dong halak na manjolom sisonai ai. Galangkon hita ma na hinarosuhkon ni Naibata.

Tonggo: *Jalo Ham ma galangannami marhitei partonggoan pakon kebaktian nami, marhasoman pambahenannami na otik in, ale Tuhan. Ia manggalang pe hanami, na hum Bamu do ijalo hanami ai. Amen.*

HALELUYA NO. 29:1-2

- | | |
|---|---|
| 1. Hanima na porsaya in,
sai alo-alo Jesus in,
pahinsah uhur nima.
Dohor ma ari pesta ni
ganupan kuria-Ni in,
bai ari partubuh-Ni.
In pe, laho ma hanima
baen adatni manjalohon,
na marayak hajolmaon | 2. Marmegah-megah uhur ma,
sagala na bujur homa,
lao mangirikkon Jesus.
In pe rombang patidak ma,
megahmu bani Naibata,
pasaud ma harosuh-Ni.
Puji, puji Jesus Kristus
na manobus tonduynima,
Humbai hamagouannima. |
|---|---|

OLOB-OLOB, HATUAHON PAKON HAMONANGAN

“Sora olob-olob pakon hatuahon do maraloling bani lampo-lampo ni halak parpintor. Siamun ni Jahowa do sibahen hamonangan.”

Psalmen 118:15

Bagei janah buei do sora na boi ibogei hita. Dong na nanget, dong na gomos. Ganup na manggoluh boi do pabogei hon sorani. Dong sora na mambahen ngernger pinggol, dong homa sora na sodap tangaron mambahen hurang-hurangan diri manangar.

Bani Psalm 118: 15 on isobut do samasam sora na maraloling, ai ma sora olob-olob. Sumber ni sora ai, in ma halak parpintor, sihabiari Jahowa na dob manjalo janah mangakui na ronsi sadokah ni dokahni do idop ni uhur-Ni.

Dihut do hatuahon boi maraloling, lang hape pitah sora na kaluar humbani pamangan. Gomosan tene sora ni hatuahon ai. Ai ma homa mambahen akuonta na gomosan do ambilan marhitei pambahenan marimbang marhitei sora atap hata-hata.

Aha do isi ni sora ni parpintor in? Ai ma sada hasaksian na mangakuhon: “Siamun ni Jahowa do sibahen hamonangan.” Pangakuan atap hasaksian on, in ma pengalaman ni par-Psalmen 118. Age bani sejarah ni Bangsa Israel torang do munsuh ni Bangsa Israel. Maruntol do sidea bani sejarah ni goluhni. Bahat do hal-hal na sihol padaohkon sidea humbani Naibata. Hotop hurang sipanganon, ipardakdak Bangsa Filistin, Amalek pakon na legan. Ge pe sonai maluah janah monang do sidea. Ganup ai lang halani gogohni, tapi halani gogoh pakon kuasa na humbani Naibata do.

Masuk ma hita bani panorang Advent. Artini managam bani Tuhanta na dob roh janah na laho roh use. Marhitei ambilan na pondok on iulgapi use uhurta ase lambin marolob-olob hita halani hatuahon pakon hamonangan na dob ipasirsir Naibata marhitei pambahenan bani goluh on, age marhitei partonggoan, parmingguan, mambasa hata ni Naibata pakon horja-horja pangidangion na legan.

Tonggo: *Pargogohi Ham ma hanami Tuhan, ase lambin maraloling olob-olob pamujionnami Bamu, hinorhon ni hamonangan na dob ibere Ham bennami. Amen.*

HALELUYA NO. 4:1+5

1. Puji Jahowa na sangap
anjaha mardohar.
Hita ganup na ringgas
na megah maruhur.
Martumpu rup,
marolob-olob ganup,
haganupan manisia.

5. Puji Jahowa, tonduyhu,
pasangap goran-Ni
Pakon ganup na marhosah
mamuji hu Bani.
Ai do talup,
baenon ni hita ganup,
dodingkon hita ma amen.

PASIRSIR DALAN

“Pasirsir dalan ni Jahowa i halimisan, bahen pintor dalan na bolon bani Naibatanta i tanoh dorging-dorging.”

Jesaya 40:3

Sanggah peresmian Tugu Pahlawan Revolusi Jenderal D.I. Panjaitan i Balige Tapanuli Utara, roh do hujai Bapak Presiden RI. Soeharto. Hinorhon ni parrohni ai, ibahen Pamarentah pakon masyarakat Sumatera Utara do persiapan penyambutan bani. Hun lapangan Terbang Polonia nari das hu Balige ipadear do sagala dalan na maseda. Na marlubang-lubang itimbun janah iaspal. Pekarangan rumah na i topi ni dalan maningon borsih janah ihondor. Bendera Merah Putih ikibarhon janah tarlobih babuy lang boi maluah. Anggo maluah itembak. Ganup on ibahen dalam rangka menyambut parroh ni Presiden Soeharto.

Anggo sonai ma ibahenjolma penyambutan mangalo-alo sada pembesar, maningon lobih hunjai mangalo-alo parroh ni Anak ni Naibata Sipaluah hu dunia on. Ai ma marhitei pasirsir dalan Bani. Na porlu sedo ase marompot hita bekerja bakti. Lobih hunjai. Ai ma ase pasirsir hita diri pakon hauhuronta laho manjumpahkon-Si. Manjumpahkon Jesus Kristus na dob roh hu dunia on, janah na laho roh use. Piga piga minggu nari pestahononta do use Hari Natal. I Sumatera Utara ma sibahatannijolma mamestahon marulak-ulak Hari Natal. Rado dong sada-sada halak sapuluh hali ia mar-Natal ibagas na satahun. Ibagas na mamestahon Natal, na porlu sedo ase ibahen hita pesta-pesta duniawi janah persiapan hujai marbois gogoh hita ibagas dana, panorang pakon pingkiran. Hadirion pakon hauhuronta do na porlu sirsir, dear, borsih laho mangalo-alo-Si. Hataridahanni ai ma marhitei na paubah uhur mardalan ibagas damei, holong, hasintongan pangarapan.

Humbani Padan Nabasaia nari das bani sadarion metode atap cara pangalo-alo bani Tuhan Naibata, na hinarosuhkon-Ni ai ma marhitei pasirsirhon hauhuron pakon diri. Ase saud la tubuh janah hundul i luluan i tongah-tongah ni rumah tangga, gereja ronsi masyarakat pe. Anggo sonai ibahen hita saud ma maluah janah martuah hita bani parroh-Ni.

Tonggo: *Ham Tonduy Napansing, roh ma Ham bannami, mangajari hanami, ase sintong hanami mangalo-alo janah manjalo Anak ni Naibata, Jesus Kristus Tuhannami. Amen.*

HALELUYA NO. 28:1+3

- | | |
|---|--|
| 1. Naha ma panjalongku,
Bamu, o Tuhankin?
Naha panjumpahkonku,
Bamu, o Rajangkin?
Sondangi Ham uhurhu,
na golap, na bodoh.
Ai sihol bahenonku
do hamegahon-Mu. | 3. Ai seng be dong na hurang
Pinasirsir-Mu on
Mambaen hubangku suang
damei ni uhurhon.
Marhoru pe uhurhu,
binaen ni dousangkin
Roh do Ham Sipagoluh
Pamalum uhurhin |
|---|--|

MAMBAHEN NA MADEAR

“Marmalas ni uhur do Ahu mambahen na madear bani sidea, anjaha suanon-Ku do sidea tongon-tongon i tanoh on, humbani gok ni uhur pakon gok ni tonduy-Hu.”

Jeremia 32:41

Sada horja ni Naibata na adong humbani mungkahni das bani panorang sadari on ai ma mambahen na madear. Ia do bah tubuh hadearon janah paruhur na madear (Lukas 18: 18). Na madear ai ihorjahon ibagas malas ni uhur, lang ibagas gila atap paksa. Ibahen sonai ge pe domma madabuh jolma in hubani dousa, songon na masa bani panorang ni Nabi Jeremia. Maksud ni Naibata sonai, sonaha ase maluah, manggoluh janah marhasonangan jolma in.

Bani Jeremia 32:41 nongkan ihatahon na isuankon do sidea hu tanoh on humbani gok ni uhur pakon humbani gok ni tonduy-Ni. Mararti na marsangaja do Naibata manempatkon halak na dob pinilih-Ni i dunia on, ase itoruskon sidea harosuh ni Naibata.

Anggo ipardiateihon hita jolma inggot iananta bani panorang on, hurang do iharosuhkon mambahen na madear on. Marsisuli-sulian do halak manlahoi. Anggo lang adong ‘masukni’ ninggan ni hata sonari, lang ra halak mangkorjahon. Umpamani paborsihkon parit, ge pe na marguna bani do ai. Tapi anggo dong do ‘masukni’ ia horja aha pe ai, sagala cara do ibahen halak.

Sebagai halak Kristen maningon marahu-ahu do hita mambahen na madear. Lang pitah bani hasoman atap famili na terdekat, tarlobih ma bani halak na so porsaya bani Jesus Kristus. Marhitei na sonai do hita sibuan Ambilan Na Madear bani sidea.

Horja sibahenon ai lang pitah bani horja na banggal-banggal tapi tarlobih bani horja na etek-etek na hotop lang sai tarjai uhurta. Umpamani: Ra tias, marpanisei na suman, panlangkah na porman, pakon buei tindakan na legan.

Ganup horja ai ibahen hita halani Jesus Kristus na dob mambahen na madear banta, iporsan do silang-Ni das bani na matei Ia, laho manghopkop hita.

Tonggo: *Ham Tonduy Napansing sirsir do hanami ipadear Ham ibagas goluhnam i ari-ari. Ase marhiteihonni ai lambin iharinggashon hanami mambahen na madear; romban hubani harosuh ni uhur-Mu. Amen.*

HALELUYA NO. 145:1+3

1. Ringgas hita rup.
manogu ganup,
na pag manendel
na hengken hobal,
bai hata ni Tuhan,
na sangap tongtong
rosuh-Ni ma bahen
i dunia on

3. Horjahon bujur
Hata-Ni ganup,
sai monang jojo
baenon-Ni ganup.
Ai Ia do Raja
na monang tongtong,
patitir pe bala
manginsurut tong.

BANGSA NA PINARMAHAN NI JAHOWA

“Tapi anggo hanami, bangsa-Mu ampa biri-biri na pinarmahan-Mu, sai Ham do pujionnami sadokah ni dokahni, anjaha baritahononnami do puji-pujian Bamu, marsundut-sundut.”

Psalmen 79:13

Ganup na tinompa in Naibata do simada pakon na marmahani. Gok bani Naibata do langit ampa tanoh on ampa haganup isini. (Psalm 24: 1) Ididah hita, mardalan do torsa ganup binatang na i parlangitan, sonai age dunia on ampa ganup isini. Naibata do tongon na marmahani, ase ganupan in totap mardalan bani na torsa. Ninta sipata, pardalanni ai ganup menurut alam. Sasintongni mardalan ganup ai halani parmahanion ni Naibata do.

Das hubani ganup goluh ni jolma pe, Naibata do na marmahani. Tapi age pe sonai, dong do jolma atap bangsa na so mangakui, na so mangkaporsayai parmahanion ni Naibata bani goluhni. Tapi par-Psalmen ai, ihaporsayai anjaha iakui das hubani na isaksihon homa, Naibata do na marmahanisi. Anjaha dihut mambaritahon puji-pujian bani Jahowa.

Naha nani hita, iakui hita do Naibata na marmahani hita? Ra do hita on marsada-sada iparmahani Naibata? Anggo ra do, sai tong sitangihon hata ni Naibata ma hita, sidalankon Hata-Ni. Ai Hata ni Naibata do na langsung marmahani hita bani panorang on.

Ase anggo tongon do ihaporsayai hita parmahanion ni Naibata banta, hinorhon ni ai ma mamuji Naibata tongtong голуhta, anjaha marusaha tongtong hita mambaritahon puji-pujianni. Ase anggiat hinorhon ni ai roh halak na legan gabe dihut mangakui anjaha mangihutkon parmahanion ni Naibata.

Ise na ra iparmahani Naibata ai do na saud monang anjaha sonang das hubani ujungni.

Tonggo: *Ham Tuhan Naibata Bapanami, Ham do tongon na marmahani hanami. Sai ra ma hanami iparmahani Ham bani ganup goluhnnami, janah pargogohi Ham ma hanami mambaritahon puji-pujian Bamu. Amen.*

HALELUYA NO. 245:1+7

- | | |
|--|--|
| 1. Na marmahani hita
parholong atei in.
In ma Jesus Tuhanta,
sibere tuah in,
sibere tuah in. | 7. Sihol pasonangon-Ni
ganupan hita on;
Sihol arahkonon-Ni
hu Surga hita on,
hu Surga hita on. |
|--|--|

PALUAHKON DO SURA-SURA NI NAIBATA

“Ai seng isuruh Naibata Anak-Ni in hu dunia on, laho manguhumi dunia on, tapi ase maluah do dunia on marhiteihon-Si.”

Johannes 3:17

Panorang on domma imasuki hita musim atap pe Minggu Advent. Na mararti do ai, tarsapuluh pitu ari nari das ma hita hubani Pesta Natal, aima pesta pardingatan partubuh ni Tuhanta Jesus Kristus, Sipaluah in.

Anggo ipardiateihon hita tahun hu tahun setiap bulan Desember, lambin semarak do acara perayaan Pesta Natal in. Jadi, lang be pitah bani tanggal 25-26 Desember tumang irayahon, tapi humbani awal Desember bani Minggu Advent I pe domma adong na marpesta Natal bani piga-piga ianan atap daerah. Bahkan das hubani akhir Desember pe sai adong ope na mambahen acara Natal.

Bani zaman modern on, marbagei model acara Natal na boi iidah hita anjaha iananni pe lang pitah i Gereja atap i daratan on, tapi i udara pakon i dasar laut pe domma adong na manlaksanahon perayaan Pesta Natal. Hansi pe 1001 masam rumang ni acara Natal in, tapi anggo motivasi pakon tujuanni totap do maronjolan hubani, realisasi ni rencana/sura-sura ni Naibata aima: “Haluahon, marhitei na marsuruh Anak-Ni hu dunia on.”

Jesus Kristus Anak sasada ni Naibata, domma roh hu dunia on. Ia na dob tubuh, matei anjaha mulak manggoluh laho mamparjuangkon haluahon ni dunia on. Dunia na dob madabuh hubani tinompa na legan na dob mardousa, gabe maluah humbani uhuman ni Naibata. Hal on aima halani bangga ni holong pakon idop ni uhurni Naibata do bani dunia on. (Joh 3: 16a) Sabonar ai do sura-sura ni Naibata humbani mungkahni das hubani ujungni, humbani na dob in, sonari ronsi sadokah ni dokahni. Porsaya do ham na dob dihut ipaluah?

Hita na dob porsaya, sonaha janah aha ma na talup bahenonta maradopkon Tuhanta Sipaluah in? Tontu tene, lang sungkup pitah mangadongkon upacara-upacara seremonial Pesta Natal songon na masa bani zaman komputer sonari on.

Tonggo: *Hasangapon pakon puji-pujian ma sombahnami Bamu, Ham Naibata, Tuhan Sipaluah. Sai iajari anjaha ipargogohi Tonduy-Mu ma hanami laho mangkagoluhkon haluahon nabinoanni Anak-Mu, Jesus Kristus. Amen.*

HALELUYA NO. 29:1-2

- | | |
|---|---|
| <p>1. Hanima na porsaya in,
sai alo-alo Jesus in,
pahinsah uhurnima.
Dohor ma ari pesta ni
ganupan kuria-Ni in,
bai ari partubuh-Ni.
In pe laho ma hanima
baen adatni manjalohon
na marayak hajolmaon</p> | <p>2. Marmegah-megah uhur ma,
sagala na bujur homa,
lao mangirikkon Jesus.
In pe rombang patidak ma,
megahmu bani Naibata,
pasaud ma harosuh-Ni.
Puji-puji Jesus Kristus
na manobus tonduynima,
humbai hamagouannima.</p> |
|---|---|

ANAK HAHOLONGAN

“Lanjar nini sada sora na hun Nagori Atas: On do Anak, haholongan ni uhur-Hu, marosuh do uhur-Hu mangidah-Si.”

Mateus 3:17

Bani na isobut anak haholongan ni uhur bani ayat on, sedo sora na roh hun dunia on atap pe sora ni jolma. Tapi sora on na roh hun Nagori Atas aima humbani Naibata Bapa na itujuhon hubani anak-Ni Jesus Kristus. Halani bani dirini Jesus Kristus jumpah harosuhni Bapa in aima ibagas na sirsir martoruh ni uhur songon na isobut Paulus bani Pilippi 2:5-8. Hal on memang jelas anjaha nyata do; dob ididi si Johannes Tuhan Jesus Kristus i Bah Jordan gabe tarboge i ma sora songon teks ni ambilan na i atas in. Jesus na tongon-tongon patoruhkon diri-Ni anjaha sipambalosi, sirsir do la ididi si Johannes. Lang homa mulai hunjon pambalasion Tuhan Jesus, tapi humbani tubuh i harang ni pinahan das hubani matei tarsilang. Halani ai patut do sobuton ni Naibata hubani Tuhan Jesus Kristus in: Anak haholonganni uhur-Ni anjaha harosuh ni uhur-Ni.

Hubani hita hagianupan na martumpu das bai panorang on aha na boi sobuton ni Naibata bani dirinta? Anggo itonggor humbani hajongjonganta sora bura-bura pakon bursik-bursik mando jaloonta humbani Naibata, ai gok dousa uhur pakon pingkiran. Tapi tarimakasih ma hatahononta hubani Tuhan Naibata halani Anak haholongan-Ni in domma iangkat martabatta gabe ipaanak hita bani Naibata ai ma marhiteihon pandidion in ibagas haporsayaon. Bahkan Paulus manokankon use domma anak ni Naibata hita hagianup anggo porsaya hita bani Kristus Jesus songon na bani Galatia 3: 26.

Jadi marhiteihonni Jesus in do gabe ibere hubanta mandat anak in bani Naibata, halani ai sirsir ma hita mewarisi pargoluhonni Tuhan Jesus in ma goluh ibagas gok holong, hasabaron, damei, lamlam maruhur pakon malas ni uhur bani na menghadapi ari-ari ni goluh on marhiteihon pangurupion ni Tuhan in.

Halani ai anggo sirsir hita mewarisi pargoluhan ni Tuhan Jesus Kristus in bani goluh on dihut ma homa hita mewarisi sora ni Naibata na hinatahon-Ni bani Anak-Ni in ai ma Anak haholongan-Ni pakon harosuh-Ni. Ra do ham/hita jadi anak haholongan pakon harosuhni Naibata? Anggo ra do, irikkon hita ma Tuhan Jesus.

Tonggo: *Ham Tuhan Naibata, tarima kasih ma Bamu, anjaha Ham Tuhan Jesus togu Ham ma hanami ase gabe anak hanami bani Bapa in, pakon Ham Tonduy Napansing ajari Ham hanami mangirikkon Jesus Kristus. Amen.*

HALELUYA NO. 107:1-2

- | | |
|---|--|
| <p>1. Irikkon nasiam ma Au,
sonai nini Tuhanta.
Sai parnalang ma dirimu,
Hatang-Ku malah harga.
Sai mambur bahenlah ganup,
parlahoumin na so talup.</p> | <p>2. Au do palihar dalanmin,
na dompak hagoluhan;
Ai seng be kahou langkahmin,
daoh pakon hamagouan.
Au parhiteian na bujur,
bai hasonangan na botul.</p> |
|---|--|

GORAN JESUS DO

“Tubuhan anak ma ia, anjaha bahen ma goran-Ni Jesus, ai paluahon-Ni do bangsa-Ni humbani dousa ni sidea.”

Mateus 1:21

Anggo dong sada anak boru boratan rumah lang sai iharosuhkon hita jolma. Maria boratan rumah iharosuhkon jolma janah iharosuhkon Naibata, halani humbani Tonduy Napansing. Maria sirsir mambere dirini pakon mandalankon rencana pakon harosuh ni Naibata. Ibagas hasirsiron ni ai buei de jolma lang dihut mangurupi Maria laho pasaudkon harosuh ni Naibata, marhitei na lang sirsir manjalo Maria pakon Josep i rumahni. Ganup rumah na i rohi mangkatahon lang dong ianan bani sidea. Harang ni pinahan gabe ianan partubuh ni Tuhan Jesus. Gati do hal na sonai tarjadi bani goluhta on. Na patut gabe pangurupi bani rencana ni Naibata, lang marhasirsiron. Sihol ma namin hita na dob manjalo hatani Naibata pasirsirhon diri, na dong banta ronsi rumahta laho pasaudkon rosuh-Ni tarlobih ianan partubuh Jesus.

Goranni na tubuh ai, ai ma Jesus, tangkas do ipatugah horja-Ni laho paluahkon bangsa-Ni atap pe hita humbani dousanta. Bani panorang on iulakkon use patugahkon ai hu tongah-tongahta bani Pesta Pardingatan partubuh-Ni. Bani Johannes 9: 5 Jesus do panondang ni dunia on, panondang bani hagolapan. Sonai ma Jesus gabe panondang ibagas uhur pakon goluhta na golap. Na golap aima lambang ni bageini horjanta na lang iharosuhkon Naibata, sitaronon pakon bagei paruntolonta. Hita na dob manjalo haluahon nabinoban ni Jesus isuruh do gabe panondang i dunia on (Mat 5: 14). Janah na bertanggungjawab do laho padashon ambilan malas ni uhur in humbani hasomanta na lape pakon na hurang manjalo haluahon pakon panondang na humbani Jesus.

Ase bani panorang on iarahkon do hita pataridahkon haluahon na dob ijalo hita bani horja pakon parsauranta tarlobih mansondangkon panondang na humbani Jesus hubani ganup jolma.

Tonggo: *Tarimakasih ma bamu Tuhan halani ibere Ham haluahon hubannami marhitei Jesus Kristus, domma homa ondos bannami na sinuruh-Mu laho padashon rosuh-Mu pakon hata-Mu. Janah bani panorang on ibagas na dob ijalo hanami haluahon in, gabe siparambilan ma tongon hanami sadokah ni goluh nami. Amen.*

HALELUYA NO. 349:1-2

- | | |
|--|---|
| 1. Goran Jesus sai marsora,
bai ganup dunia on.
Goran Jesus pasonangkon,
ganup na marhoru in.
Goran in marpasu-pasu,
bai ganup pardousa in.
Goran Jesus sijengesan,
lao paborsih uhurhin.
Haganupan do idilo,
bani gomgoman-Ni in.
Martarima kasih ahu,
ibaen na itobus au. | 2. Goran Jesus marsinondang
bani laut 'ge tanoh in.
Marmalas ni uhur hita
pasangapkon goran-Niin.
Magou ma pusok ni uhur,
halani goran-Ni in.
Anggo porsaya bai Jesus
Jesus talu do na jahat in.
Goran Jesus sijengesan,
lao paborsih uhurhin.
Martarima kasih ahu
ibaen na itobus au. |
|--|---|

TOTAP TAGAM

“Sai margondit ma binongeinima anjaha gara ma lampunima. Anjaha usih ma hanima bani jolma na paima-imahon tuanni, sadihari ia roh hun parunjukan, ase mintor iungkab ia rohkonsi ia mangkartuki.”

Lukas 12:35-36

Bani tahun 1963 i Binjei, husungguli do sahalak ABRI hasomanku, ningku sonon: Mase lang roh ham bani padan na dob tinontuhonta? Ngolngolan diri paima-imahon. Roh balosni sonon: Yah... Tiba konsyinyering hanami dahkam. Aha konsyinyering ningku? Roh balosni sonon konsyinyering ai ma parentah ni komandan, ase siap siaga haganup kesatuan tentara janah lang boi manadingkon pos. Siap siaga artini use, ai ma: Berpakaian lengkap songon na siap tempur janah totap marjaga-jaga bani pos ni bei.

Usih hujai do ambilanta on. Iumpamahon Tuhan Jesus do bani lumba-lumba-Ni ase sai margondit binongeita anjaha gara lampunta. Atap ase totap hita konsyinyering bani goluhta on. Margondit binongei mararti do ai, totap bergairah, bersemangat, janah ibagas malas ni uhur, ulang lolei.

Bani ayatta on domma jelas ibotoh sipangalo-alo on, bahasa na positip do, resmi do tuanni ai laho roh. Hansi panorang sadihari, jam piga, lang ibotoh halani ai maningon totap ia tagam.

Jadi apala na penting sonari ai ma, sonaha dalanni ase boi ilaksanahon hita bani goluhta ari-ari na totap tagam on?

1. Ulang tanggal gondit hubanta, totap pakei. Maksudni ai ma, ulang marnaholang hita mamuji pakon pasangapkon Tuhanta, manangihon Hata ni Naibata, mandoding pakon martonggo.
2. Ulang mirlop-iriop lampunta atap miloh, maksudni: Ulang marsipata-sipata sompat ibahen hita martonggo on dompak Naibata atap ulang mintor total lang ihaporluhon uhurta na pasangapkon pakon na mamuji Tuhanta.
3. Sabonar ulang ma adong tubuh ibagas uhurta, holi pe, bani tuani goluhku ma, anggo sonari sanggah poso ope angkula. Ulang sonai.

Tapi ingat hita ma: Martuah ma halak na totap haporsayaonni, ai rohkonsi panorangni marturiak pakon Tuhanta jumpahsi ma malas ni uhur sisadokah ni dokahni.

Tonggo: *Ham Tuhan Naibata na marianan i Nagori Atas, suruh Ham ma Tonduy-Mu Napansing in marianan ibagas uhurnami ganup ari, ase Tonduy-Mu in mamparuhuri pakon mampargogohi hanami, ase boi hanami totap ibagas na tagam, na bergairah, na bersemangat bani goluhnami on. Amen.*

HALELUYA NO. 184:1-2

- | | |
|--|--|
| 1. Manjaga ma hanima
na bujur uhur in;
Nahiti suluhnima
ai roh ma borngin in.
Na roh ma Siparunjuk
bai tunangan-Ni in.
Na tong mangkasiholi
Parunjukan-Ni in. | 2. Pasirsir suluhnima,
gok minak bahen in.
Managam Tuhannima
siboban Tuah in!
Ai na marjaga Sion
do na mandilo Ham;
Dohor ma hatuahon,
roh ma Rajamu bam. |
|--|--|

DILO MA JAHOWA IBAGAS HASINTONGAN

“Dohor do Jahowa bani sagala na mandilo-Si, bani haganup na mandilo-Si ibagas hasintongan.”

Psalm. 145:18

Anggo rap mardalan orangtua pakon niombahni na danak ope, iusahahon niombah ai do ase orod, dohor, rapat ia tong pakon orangtuani. Mabiari do niombah ai padaoh-daoh pakon orangtuani ai, mase? Ai ma halani pitah hubani orangtuani ai do hansa pos ni uhurni. Lang adong iahap habiar anggo dohor ia tong bani orangtuani. Janah porini dong na mangganggusi mintor do idilo orangtuani ai.

Sonaha hita dampak Naibata Jahowa? Iusahahon hita do ase tong dohor hita Bani? Anggo Jahowa dohor do tong bani sagala na mandilo-Si, bani sagala na mamorluhon-Si, bani sagala na marusaha rapat tong hu Bani. Janah sebalikni daoh do Naibata Jahowa bani sagala na so mandilo-Si, bani sagala na tidak mau tau hu Bani. Sonaha dong do idilo hita Naibata Jahowa bani голуhta siganup ari? Ise do idilo hita bani panorang malas ni uhurta atap bani panorang pusok ni uhurta? Mandilo Jahowa mararti do ai berhubungan, berkomunikasi, marsaor tong pakon Naibata Jahowa janah manurut hata na somal bani ha-Kristenon ai ma martonggo tong dampak Jahowa, ipuji janah ipasangap Jahowa do ia martonggo mangindo pangurupion. Tapi porlu botohonta homa, ia na mandilo Jahowa lang asal dilo-dilo, martonggo bani Jahowa lang asal tonggo-tonggo, tapi pandilo ai, tonggo ai maningon ibagas hasintongan do.

Ambilanta on ai ma Doding Puji-pujian ni Raja Daud dampak Jahowa sanggah goluhni. Iahapkon Raja Daud do sonang ni na mandilo Jahowa bani goluhni, aha pe lang hurangni iahap, hansi pe Raja Daud hotop maruntol, hotop madabuh hubani dousa sehingga manaron ia. Sai Jahowa ma dilo hita bani голуhta ari-ari ai sirsir do Ia tong manangihon, mambalosi pakon mambere na porlu banta romban bani harosuh ni uhur-Ni. Anggo sonai dapot hita ma malas ni uhur bani goluh on janah sanggup ma hita manantang sagala liku-liku ni goluh ari-ari.

Tonggo: *Ham Tuhan, ajari Ham hanami mandilo goran-Mu ibagas hasintongan, balosi Ham dilo-dilonami, balosi Ham tonggo pangindoannami romban bani harosuh ni uhur-Mu. Amen.*

HALELUYA NO. 451:1+3

1. Sihol do uhurhu,
patimbulhon Ham Jahowa,
na pagoluhkon au pardousa.
Sanggah na hudilo,
Goran-Mu lao mangurupi,
sirsir do Ham roh mambalosi
Itogu Ham do,
au humbai lombang bagas,
In ma ianan hagolapan.
Sai boban Ham ma au hu Nagori Atas,
ase tongtong marhasonangan.

3. Ham do patorsahon,
pardalanan ni goluhku,
ase ulang ahu tarbador.
Ham do parlingodan,
dolak batu baen gantarhu,
ase boi au marmalas uhur.
Itogu Ham do,
au humbai lombang bagas,
in ma ianan hagolapan.
Sai boban Ham ma au hu Nagori Atas,
Ase tongtong marhasonangan.

PINGKIRAN NI NAIBATA

“Tapi tarbahen-Si do lobih humbani na pinindonta barang na piningkiranta, domu hubani hagogohon na marhorja ibagas hita.”

Epesus 3:20

Buei do halak na marmalas ni uhur halani dapotsi songon na pinindoni, songon na piningkiranni sesuai hubani rencanani sonai age waktu na binuhulni pe topat. Dear do ai, dear do bangga positip hita. Tapi sada sidingatonta bahasa buei homa do na so tercapai pangindoanni pakon pingkiranni lang dapot sesuai hubani programni. Malah deba hotop homa suhar humbani na pinindoni pakon pingkiranni na tarjadi. On ma buktini na terbatas do pingkiran ni hita jolma janah na mambuktihon homa bahasa na adong do sintong Naibata ai ma na marhagogohon i luar ni hagogohan ni jolma. Anggo Apostel Paulus pakon halak Kristen na sintong tubuh ma pangakuanni pakon haporsayaonni bahasa on ma pingkiran/hagogohan ni Naibata. Jadi halak Kristen anggo mambahen sura-sura pakon perencanaan ia, ipangindohon do bani tonggoni ase jorei mardalan programni ai romban hubani harosuh ni uhur ni Tuhanta, janah ipangindohon ase gagal rencana ai anggo lang romban bani harosuh ni Tuhan.

Porini roh sungkun-sungkun hubanta sonon: Halani buei ni jenis ni hagogohon, hagogohon aha do na marhorja ibagas uhurta? Anggo hagogohon na hun dunia tumang do, atap pe hagogohanmu tumang do dob ni manjurus hu bani na so harosuh ni Naibata do na mangakibatkon pusok ni uhur atap patubuhkon pandoleion.

Ibotoh hita do sonaha pusok ni uhur ni si Jakob halani peristiwa na terjadi bani anak kasihanni si Josep. Hape dob dokah ibotoh ma bahasa na maningon melalui proses na sonai hape mardalan pingkiran ni Naibata ase jadi Raja si Josep i Tanoh Masir pakon ase gabe penyelamat si Josep bani saninani sanggah musim lohei maningting. Bagas do artini falsapah ni Simalungun na mangkatahon sonon: Na matobu ulang mintor ni bondut, janah na mapaet ulang mintor ni utahkon. Buei do janah bagei do sura-suranta, na piningkiranta, rencananta atap pe ai pangindohan ni niombahta, horjanta sonai age tahun na roh on, dear tumang anggo iondoshon hita ai haganup hulobei-lobei ni Naibata pajoreihon romban hubani harosuh ni uhur-Ni.

Tonggo: *Tuhan tarbatas do jangkauan ni pingkirannami pakon gogohnami, tapi anggo Ham tarbahen Ham do haganup. Halani ai hu Bamu do hanami marondos bani haganup goluhnam i ari-ari sonai pakon pingkirannami, rencananami ase mardalan romban hubani harosuh ni uhur-Mu. Amen.*

HALELUYA NO. 126:1-2

- | | |
|--|---|
| 1. Dear ni in panogu-Mu, Jahowa,
bani ganup na pinarmahan-Mu.
Seng anjai roh baenon-Mu na dorsa,
seng tarponopkon Ham be bujur-Mu.
Gati suhar do pambahenan-Mu,
bai uhur ni na so mananda Ham,
hape halani in marrohan bei,
bai hatorangan na tinobus-Mu. | 2. Ai mintor ra Tonduy-Mu mangirikkon,
bai titah na binaen ni jolma in?
Ham na tongtong tarlobih in maruhur,
sai sura-sura-Mu do saud in.
Sai talu do na pag mangimbang Ham,
age ganup marbois gogoh in;
Ai Ham do na so halompouan in;
maningon saud do sura-sura-Mu. |
|--|---|

JOLOM HAM MA SORTALIMU

“Barah ma Ahu roh! Jolom ham ma na dong bamu, ulang dong na mambuat sortalimu.”

Pangungkabon 3:11

Ibere Jesus do diri-Ni gabe haluahonta. Iajari ronsi ipodahi do hita ase tong mardalan ibagas harosuhni Tuhanta. Ambah ni ai ope ibere do pangarapan banta, bahasa marhitei haporsayaonta hubani Jesus Kristus mangkorhon haluahonta.

Ibagas na mangkajongjonghon haporsayaon ma hita gati maruntol halani bagei ni tantangan ihadapi. Sonai do homa keadaan ni Kuria Filadelfia, ianan huja ikirim si Johannes pangungkabon on. Bani panorang na paima-imahon, loja do pangahapta. Bani panorang ai do homa bagei ni paruntolon na ihadapi hita. Gabe ra marsungkun-sungkun hita hubani goluhta age hubani hata ni Tuhanta na dob ihaporsayai hita.

Lang ipaturut Jesus hape hita ngolngolan, marsahap do Ia marhitei Hata-Ni, bahasa barah ma panorangni roh ma Jesus hu tengah-tongahta. Ase jolom hita ma na dong banta, ulang ipaluah hita ase ulang magou barang lang dong sortalinta. Ai hagoluhan sisadokah ni dokahni do ilayak-layakhon hubanta asal ma totap ijolom hita sortali hagoluhan ai.

Jesus do na boi mangurupi hita, ase boi tarjolom hita sortali na dob dong banta, ase ulang magou. Marhitei Jesus do homa ase dapotan hita porini pe roh parlajouan, asal ma poltik ijamah hita sortali hagoluhan ai pasti do monang hita. Lang porlu be ngayotan barang loja hita laho paimahon parroh ni Jesus. Ai barah ma la roh. Ibaratni apuy ondi ai, domma boi iahapkon hita pamilasni tanda ni na dob dohor apuy ai hubanta. Age pasal parroh ni Jesus, ulang be sangsi. Haganup na hinatahon-Ni pasti do terlaksana.

Sonaha nani domma ijalo ham hata ni Tuhanta? Atap hatani orangtua do hansa na dong bamu, ai pe orangtua na dob parlobei marujung goluhni do? Ase sonari ma panorangni hita paubahkon uhurta, jolom hita ma Tuhanta marhitei na mangkorjahon Hata-Ni. Porsaya ma hita, Jesus do Sipaluah hita, janah Ia ma na laho roh ai. Roh ibagas hasangapon, ase manean hagoluhan hita na porsaya Bani.

Tonggo: *Ham Tuhan Jesus pargogohi Ham ma hanami tongtong laho manjolom sortali na niondoshon-Mu hubennami. Ase halak na porsaya hanami ronsi marpangarapan bani parroh-Mu in na gabe haluahonami. Amen.*

HALELUYA NO. 295:2-3

- | | |
|--|---|
| 2. Marolob-olob ma ijin
ganup na dob tinobus;
Siholan do ganupan in
bai Jesus in Partobus
Roh do use Tuhanta in
Ibagas hasangapan in,
sai roh ma Ham, o Jesus,
sai roh ma Ham, o Jesus. | 3. Satongkin nari tangkog rup
marhitei-hitei hambun,
rap pakon Jesus lao ganup
hu surga in ituju;
Sai longang bei do in hape,
bai hasonangan in use;
I surga bai na sonang,
i surga bai na sonang. |
|--|---|

NAIBATA PARIDOP NI UHUR

“Puji-pujian ma bani Naibata, Bapa ni Tuhan Yesus Kristus, Bapa paridop ni uhur ampa Naibata sipangapoh in.”

2 Korint 1: 3

Porini ibilangi hita haganup na masa bani goluhta, buei ni in tanda halongangan na tarjadi tene. Bahat na masa in na so panagaman ni uhur. Lang tarpingkiri hita. Age i tongah-tongah ni keluarga, kuria ronsi masyarakat pe, haganup gok tanda halongangan.

Porini pe ihatahon sada halak: “Aha pe lang malas ni uhur nami das hubani na laho marujung ma use tahun on,” domma iladungi dirini age Naibata. Na hurang tulimat do ia mamareksa na masa na bani goluhni mambahen sonai panluarni. Hape porini iulakkon use mamareksa, boi ma dapotsi bahasa haganup in ai ma halani idop ni uhur ni Tuhan Naibata. Ge manangar hata ni Naibata hita sonari ai pe domma idop ni uhur ai. Ai lang buei do hasoman sihol uhurni manangar hata ni Naibata hape seng boi be songon na salpu in?

Ase rap ma hita mamuji Tuhanta marhitei goluh na martarimakasih ronsi puji-pujian. Pasirsir hita hadirionta lao mangalo-alo Pesta Partubuh ni Tuhanta Yesus Kristus. Nuan ai ma panorang Advent. Panorang pasirsirhon diri laho mangalo-alo Sipaluah in. Ase parlobei ma tandai hita haganup idop ni uhur-Ni ronsi holong ni atei-Ni, ase gabe halak na sintong hita mangalo-alo Jesus bani goluhta on.

Ai panorang pangalo-aloon ibagas uhur na martarimakasih ronsi mamuji Naibata do panorangta sonari on, ase marianan ibagas dirinta. Ase Ia simada hita. Ija do boi hita marmalas ni uhur, halani seng hita be simada dirinta tapi domma Jesus. Ase patut dingat hita haganup pambahenan ni Naibata ibagas dirinta marhitei panghopkopon ni Tuhan Yesus. Ibagas na talar do holong ni atei ni Tuhan hubanta boi hita mamuji Naibata marhitei goluh na martarimakasih.

Tonggo: *Ham Bapanami, tarima kasih pakon pujionnami ma Ham halani haganup idop ni uhur pakon holong ni atei-Mu na tongtong mangkasomani hanami. Urupi Ham ma homa hanami ase halak paridop ni uhur ronsi parholong atei hanami hubani hasomannami hunjon hujanan. Amen.*

HALELUYA NO. 302:1+3

- | | |
|---|--|
| 1. Puji hita Naibatanta
puji hita Anak-Nin.
Puji hita 'ge Tonduy-Ni,
Sitolu sada do in.
Haleluya, Haleluya,
Sitolu sada do in. | 3. Haleluya isombahkon,
na porsaya hu Bamu
Bai arian pakon borngin,
idodingkon hu Bamu
Haleluya, Haleluya,
idodingkon hu Bamu |
|---|--|

DAMEI MARHITEI KRISTUS

“Marsitabian ma nasiam marhitei summah holong ni uhur. Damei ma bani nasiam haganup na ibagas Kristus.”

1 Petrus 5:14

Mase ibahen Bapa-Bapa ni Kuria na parlobei in goran-goran ni Minggu? Balosni on do: Ase marhitei goran ni Minggu ai boi homa hitei ni Ambilan Na Madear in laho patorsahon haporsayaon ni halak Kristen, ase marhiteihon ni ai ibotoh ma pasirsirhon diri domu bani goran ni Minggu ai. Tapi na marpardomuan do hubani simada ari ai, ai ma Tuhanta Jesus Kristus.

Bani panorang Advent on aha do na ipangindo Minggu on humbanta? Domu hubani podah ni Apostel Petrus on, sai ra ma hita marsitabian ibagas holong. Halani parlobei do hita manjalo holong humbani Tuhanta, halani ai patut do hita marsihaholongan samah hita ibagas goran ni Tuhan Jesus sihopkop hita. Anggo lang hita manggoluh ibagas holong ni Kristus, lang sanggup hita mangkaholongi hasoman.

Gogoh anjaha sorta do holong na humbani Tuhanta, ai ibagas holong-Ni buei do tarrungkub dousanta. Buei do damei. Dong do damei idarat, tapi ibagas tong do ringis, ai ma na igoran sapari: domdom. Halani aha do ai? Ai ma halani lang damei na ibagas Kristus marianan banta. Ase marhitei damei ni humbani Jesus do boi botul-botul hita mardamei atap marsisasapan dousa pakon hasomanta. Jadi boi ma ai mamboan hita gabe harosuh ni Tuhan Jesus.

Balosi hita ma pangindoan ni Minggu Advent on. Pataridahkon hita ma hasabaronta bani haganup jolma halani Tuhan in. Sonai homa holong ni uhurta, tanda ni na sirsir hita manasap haurangan ni hasomanta, tanda ni na dob marianan banta damei na humbani Jesus Kristus.

Tonggo: *Ham Jesus Tuhannami, pargogohi Ham ma hanami ase tarhorjahon hanami parsaoan na madear i tengah-tengah ni kuria-Mu, age ibagas keluarga, bahen hasangapon ni goran-Mu. Amen.*

HALELUYA NO. 412:1+3

- | | |
|--|--|
| 1. Marodor na porsaya ganupan,
na laho misir hu parmingguan,
damei do tongtong.
Tunggung jagiah do idahon,
minar do bohi ni ganupan,
damei do tongtong. | 3. Porini pe adong lobih hurang,
pongkut do manangihon ambilan,
damei do tongtong.
Tanda do ganup na dob monang,
tinobus ni Jesus parholong,
damei do tongtong. |
|--|--|

HAGANUP DO IPATUNDUK

“Haganup do ipatunduk hu toruh ni nahei-Ni, anjaha ipabangkit do Ia kopala ni haganup, bani kuria in.”

Epesus 1:22

Biasa do ididah hita dunia on, na marsipatuduhkon hajagoanni, sonai age bani pambotoh, sonai age bani gogohni. Maksudni ase ia sijagoan, sibotohan ampa ase ia sigogohan. Tapi sonai pe lape tarpatunduksi haganup. Bani sada persoalan do hansa ia boi juara.

Apostel Paulus masuk na jago ma ia iahap bani parugamaon sanggah lape idilo Jesus ia. Tapi dob iparsahapkon Jesus ia i Huta Damaskus, gabe tunduk ma ia bani parentah ni Tuhan Jesus, anjaha bani ayat na i atas in isaksihon si Paulus ma: Haganup do ipatunduk hu toruh ni nahei-Ni. Anggo igoran haganup, lang dong be na so dihut, anjaha dihut ma ijai hamateian.

Malas tumang do uhurta anggo Jesus gabe sipaluah, anjaha podas tumang do iakui hita ai. Halani bahat do sihol bereon-Ni hubanta, ai ma: Hasasapan ni dousa, pasu-pasu, pakon na legan. Tapi anggo iakui hita Ia gabe Sipaluah maningon homa iakui hita paboa Ia pe Raja do. Aha ma artini ai anggo iakui hita gabe Raja? Artini maningon tunduk hita hu Bani, mandalankon harosuh-Ni, hata-Ni pakon parentah-Ni. Ai anggo lang hita tunduk hu Bani, ai ma tandani lang ope Ia gabe Raja banta atap siparkuasa banta. Janah anggo Ia ma Rajanta, boi ma hita bebas humbani gomgoman ni dousa, halani dihut do dousa ai ipatunduk. Halani ai boi ma hita marmalas ni uhur laho mangalo-alo paroh-Ni.

Ulang ipalambat hita partubuh ni Jesus ibagas uhurta, ase Ia simada haganup na adong in, ase boi malas uhur bani goluh on, janah lambin rarat Harajaon-Ni i dunia on marhiteihon ni na porsaya hita Bani, sonai homa marhitei kuria.

Tonggo: *Ham Jesus Tuhan Sihopkop hanami, Ham na gabe Rajanami, rajai Ham ma uhurnami. Patunduk Ham ma uhurnami marhitei Tonduy Napansing, ase margoluh na pinapansing Mu hanami. Amen.*

HALELUYA NO. 141:1-2

- | | |
|--|--|
| 1. Jesus, Raja ni Kuria,
na pansing janah porsaya,
pasu-pasu Ham au on.
Sai papuho Ham uhurhu,
mangirikkon Ham Rajangku,
Pargogohi Ham au tong,
pargogohi Ham au tong. | 2. Tonduy Napansing ma bere,
roh bai uhur ni Kuria
bai ganup dunia on.
Ase tong sada uhurni,
gembit, kerap pe halakni.
Pasangapkon Ham tongtong,
pasangapkon Ham tongtong. |
|--|--|

SOLA FIDE

“Tapi torang do, paboa seng adong na pintor i lobel ni Naibata bahenon ni Titah in, ai parpintor humbani haporsayaon do manggoluh.”

Galatia 3:11

Sola fide artini *“Pitah halani haporsayaon do,”* on do na tinokanhon ni Martin Luther bani horja laho papitahkon kuria in, ibuat humbani hata ni Naibata, tarlobih na tarsurat ibagas surat Galatia pakon Rom. Seng dong na ginoran parpintor anggo halani na mangkorjahon Titah do, ai sai dong do tong hurangni. Pitah halak na porsaya bani Jesus do boi gabe pintor, halani na ipintori Jesus.

Hunjon ma taridah paboa pamintorion na humbani Jesus sedo halani usahanta hape ai, tapi idop ni uhur ni Tuhanta do dompak hita. Pangkorhonni haporsayaonta dompak Jesus gabe manggoluh hita, ai ma goluh na manongtong, na so tarlanglangi hamateian. Patut ma jaloonta janah ihaporsayai uhurta Jesus na roh mamintori hita.

Lang homa mangkatahon na so marguna Titah in bani na porsaya, marguna do, tapi pitah songon hondor mando, sedo gabe alat laho mamintori hita. Seng halani na ihorjahon niombah paraturan-paraturan na binahen ni orang-tua ase margoran niombah ai niombah, tapi niombah na mangkahalongi orang tua ni idalankon do harosuh ni orang tuani.

Patut do malas tumang uhurta mangalo-alo Tuhanta Jesus bani panorang Advent on, halani ai do na mamintori hita, la do sihaporsayaonta, na mangkorhon hagoluhan sisadokah ni dokahni banta. Na so mungkin hinan ipintori hape halani parroh ni Kristus gabe boi hita pintor janah maluah humbani gomgomanni dousa pakon Titah na so boi mamintori in.

Tonggo: *Ham Jesus Tuhannami! Tarimakasih ma hatahonon nami Bamu, halani Ham do hapintorannami pakon hagoluhannami. Pargogohi Ham ma hanami marhaporsayaon dompak Ham, ase dihut hanami manggoluh i lobei-Mu. Amen.*

HALELUYA NO. 26:1+3

- | | |
|--|--|
| 1. Malas ma uhurnima,
na pintor uhur in.
Domma roh Rajanima,
mamboba tuah in.
Seng marpanrantam in
anggo bani parroh-Ni;
Nai pe tuk do gogoh-Ni,
padaoh dorunta in. | 3. Ganupan hita jolma
tangihon Raja on.
Ai baen hagoluhanta
do la ase roh
ai hita na lansei
na manlawan bai Hata-Ni,
Roh do holi gila-Ni
manguhum hita bei. |
|--|--|

BUAH

“Parbuahkon nasiam ma buah, tanda ni na dob mubah uhur!”

Lukas 3:8

Age pe ipuji-puji hita hinajenges ni sada hayu, janah mangarap hita mambuat buah na hunjai, hape lang dapot hita buahni, malas uhurta mangidah hayu ai. Sebalikni do use na roh, gabe hiran an use hita.

Buah hamubahon ni uhur ipindo Tuhanta humbani ganup hita, seng pitah terdaftar goranta ibagas kuria, seng pitah tardidi hansa, atap hataonkon ma tene seng pitah asal goranta Kristen, tapi marbuah ma. Hamubahon ni uhur ibagas kuria in seng ipindo pitah humbani parhorja kuria, tapi dihut do age humbani anggota ni kuria, seng pitah na maposo hansa porlu paubah uhurni ibagas zaman modern on, tapi dihut age orang tua pe.

Buah hamubahon ni uhur ai ma na taridah ibagas голуhta marsada-sada secara total, artini: Anggo panangko janah partinggil hinan bangkanta, seng pitah na manangko ai paubahon gabe lang manangko be, hape torus partinggil. Lang! Ganup do buah na so hinarosuhkon ni Bapanta na i Nagori Atas ai paubahonta gabe buah na hinarosuhkon ni Tuhanta.

Lang marlaku hape ibagas ha-Kristenonta hata na mangkatahon “Parlahouni na sada ai ma na so tarpaubahsi.” Umpamani domma mubah sada halak humbani piga-piga parlahouni na so madear, tapi anggo na mamorsou ai lang tarpasohsi. Anggo sonai ope jumpah banta marsada-sada, ai ma tandani lape iparbuahkon hita buah hamubahon ni uhur ai.

Banggal do bahaya ni na mubah tanggung-tanggung. Anggo dong sada horja na so patut ibagas ha-Kristenon na so ipaubah hita, hape domma igoran halak hita parhorja ni kuria, lang piga halak be na ra mangambilani hita pasal ai, halani parhorja hita, dobni torus ma hita ibagas hajahatonta na sada ai. Ai ma use mambahen seda buah na legan na madear ai.

Ipindo ambilan ni si Johannes Pandidi on do banta sonari, tarlobih lao mangalo-alo Tuhanta ibagas panorang Advent on, ase ipaubah hita uhurta pakon sintong, lang boi alang-alang. Ulang be dong dousa hasian banta bei.

Tonggo: *Tuhan, Hata-Mu do na boi gabe gogohnami ase boi hanami marbuahkon buah, tandani na sintong mubah uhurnami. Urupi Ham ma hanami Tuhan, ase saud hanami marbuah na hinarosuhkon-Mu. Amen.*

HALELUYA NO. 300:3

3. Paubah hita uhurta, ale
na sombah ma Tuhanta!
Harga hita itobus, ale,
Sai ulang namin soya.
Abakkon, abakkon na mapansing, ale
galangan bai Tuhanta.

ADVENT, MARHASOMAN MALAS NI UHUR AMPA OLOB-OLOB

“Ai ipamalas Ham do uhurhu, Ham Jahowa marhitei pambahenan-Mu, marolob-olob do ahu mangidah jadi-jadian ni tangan-Mu.”

Psalmen 92:5

Pandei do hita anggo mamilangi malas ni uhur atap sibere-bere ni Naibata hubani hasomanta. Anjaha hotop urahan janah dokahan pardingatta bani pusok ni uhur na onga ijalohon hita sandiri. Halani ai do ase isobut na marpambotoh: Ratahan tong na idah suansuanan i alamanni hasoman, marimbang na ilamanta sandiri. Dobni, tarsuan ma bibit keputusan ai bani hadirionta.

Par-Psalmen on, boi ia mamilangi tangkas “malas ni uhurni sandiri” hinorhon pambahenan ni Naibata hubani. Tarbahen sonai, ai ma halani haporsayaonni dompak Tuhanta in. Porini pe dong hasunsahan bani goluhni, boi ope ihira uhurni bueian do malas ni uhur na dob binere ni Tuhan hubani. Sugari pe sadari on ia ibagas pusok ni uhur, boi do iahapkon tangkas bagei ni malas ni uhur na dob ijaloni bani ari-ari na so habilangan na dob nilopusanni. Anjaha, bani ari-ari na so habilangan, hu lobeian on tubuh do ibagas pangarapanni, jaloongi ope homa malas ni uhur humbani Naibata. Pangkorhon ni ai, boi do ia mandodingkon: Ipamalas Ham do uhurhu, Ham Jahowa, marhitei pambahenan-Mu. Dob ai, mangidah jadi-jadian in pe, mangkorhon olob-olob do ai bani dirini laho mamuji Naibata. Lang isungkoti na dong in pamujini hubani Tuhan. Ipakei do na dong in, paingatkonsi laho mandodingkon olob-olob hubani Tuhan in.

Bani panorang advent do hita nuan. Panorang pangalo-aloon bani haluahon ai. Ihasomani pambahenan pakon jadi-jadian ni tangan ni Naibata na so marnamaronti ai do hita, laho mangalo-alo ari haluahon in. Halani ai, padaoh hita ma holsoh ni uhur humbani dirinta, poltik ma jolom hita pangarapan in janah marmalas ni uhur ampa marolob-olob ma hita paima-imahon ari haluahon ai, mamuji Naibata.

Tonggo: *Ipamalas Ham do uhurnami, Ham Jahowa, marhitei pambahenan-Mu, marolob-olob do hanami mangidah jadi-jadian ni tangan-Mu. Amen.*

HALELUYA NO. 28:2+6

2. Ganupan par-Sion-Mu
do mangolobkon Ham,
Sonin homa uhurhu
lao mangayaki Ham.
Na megah do uhurhu
mamuji goran-Mu.
Bujur sura-surangku
pasaudkon uhur-Mu.

6. Ganup na pusok uhur
halani dousa in,
Tangihon hata mungmung
na roh hun Surga in;
Ai roh ma Sipagoluh
Isuruh Bapa in
pasonang uhurnima.
mamboan damei in.

ADVENT, MARHASOMAN SINALSAL

“Idop ni uhur ni Naibata do mambahen roh sinalsal hun datas marayak hita.”

Lukas 1:78

Sinalsal do na boi podas mangusir hagolapan. Ase porini sonaha pe lotir ni hagolapan in, anggo masuk hujai sinalsal, lintun do na golap ai. Binahen ni dousa, dunia on, ge pe sonin jengesni, iiani hagolapan do. Dousa ai do homa na imaksud hagolapan ai. Dobni, haganup jolma ge pe dong ai songon na “bujur-bujur” idahon, pardousa do homani.

Akibat-akibat ni hagolapan boi do tangkas iarusi hita. Dong hinan pe na patut i lobei atap i lambung diri, lang na idah. Mandosdos na mando haganupan. Dob ai, hotop ma hita kehilangan arah, anggo marianan hita ibagas na golap in. Gok homa habiar janah bagei ope na legan, pangkorhon ni hagolapan nongkan. Sibanggalan anjaha sijanginan hunjai, anggo manggoluh hita ibagas hagolapan atap dousa ai, ai ma hamateian sisadokah ni dokahni. Lingod humbanta hagoluhan na pinasirsir ni Naibata. Buei do namin na boi gabe sumber ni sinalsal; i tanoh on, tarlobih bani panorang, hamajuan nuan. Tapi sinalsal na i tanoh on, mangurupi panonggorta do hansa ai mangidah na dong nuan i tanoh on, na patut boi sitonggoronta. Mangusir hagolapan binahen ni dousa, lang boi pakeion. Ase sinalsal na boi mangusir hagolapan halani dousa, pitah na roh humbani Naibata do hansa. Ai ma Jesus Kristus sandiri. Jesus do na boi mangusir hagolapan ni paruhuronta, binahen ni dousa. Marhitei Jesus homa, tangkas boi iidah hita tujuan ni pardalanan ni голуhta. Boi ididah hita homa haluahon na sihol sibereon ai hubanta.

Sangghah musim Advent on, sirsir do homa sinalsal ai mangkasomani hita paima-imahon ari haluahon ai. Laho palihar dalanta janah patuduhkon situjuan ni голуhta. Marhasoman ma hita pakon sinalsal ai, marhitei parsauran na jenges.

Tonggo: *Hasomani Ham ma hanami Tuhan, bani ari-ari ni goluhnami, ase boi torang uhur pakon langkahnami, paima-imahon ari parroh-Mu in. Amen.*

HALELUYA NO. 27:3-4

- | | |
|--|---|
| 3. Martuah do nagori in,
dob ijalohon Raja in;
Uhurta pe sai sonang do
dob masuk Raja in na roh.
Lihar tumang uhurta in,
dob roh Panondang in hujin.
In pe napuji ma
Tuhanta Naibata. | 4. O Jesus, roh ma Ham hujon,
domma huungkab uhurhon.
Patuduh hinaholong-Mu,
ondoskon hinalayak-Mu.
Marhitei-hitei Tonduy-Mu,
bobai ma au hu Surga in.
Ase tongtong ijin
Hupuji goran-Mu |
|--|---|

ADVENT, MARHASOMAN HOLONG, APOH-APOH AMPA PANGARAPAN

“Ase Tuhanta Jesus Kristus pakon Naibata Bapanta, na mangkaholongi hita anjaha na mambere apoh-apoh na manongtong ampa pangarapan na madear marhitei idop ni uhur.”

2 Tessalonika 2:16

Masombuh tumang ma pangahap ni sada halak, anggo iahapkon lang adong be hasoman na boi mangkaholongi, mangapoh ronsi na mambere pangarapan pe. Akibat ni sisonai ai, ra ma tubuh use pandoleian ibagas goluh on. Paulus patugahkon hubanta, hasadaon ni Tuhan Kristus pakon Naibata Bapa hubani na porsaya in. Manongtong do holong ni uhur-Ni sonai age apoh-apoh-Ni hubani na porsaya in. Itubuhkon do homa hubanta pangarapan na madear, marhitei idop ni uhur-Ni. Ase, anggo halak na porsaya, lang anjai tubuh pandoleian ibagas goluhni. Sonai do pagori ni kuria na i Tesalonika ijia. Porini pe bagei tantangan ijalahon sidea, halani Kristus, lang mundur sidea.

Ibagas panorang Advent on, ipaima-ima hita do parroh ni Tuhan na paduahalihon ai. Ibagas panorang na paimahon ai hita, porlu do tangkas hubanta horja ni Tuhanta na sai tongtong sirsir dihut mangurupi anjaha mangkasomani hita laho mangalo-alo harosuh-Ni. Ase lang i paturut hape hita lungunan, pori ni pe la do na sihol sipaimaon marhitei parroh-Ni ai. Sedo hape songon pangalo-alo naomal masa banta i tanoh on, ija ipaturut lungunan sipangalo-alo ai.

Sipaimaonta ai pasti do homa. Holong-Ni, apoh-apoh ronsi pambere-Ni hubanta pangarapan na madear in, dihut do ai patugahkon hubanta hasasaud ni parroh-Ni ai. Ase lang boi marduaan ni uhur hita bani ai. Pangkasomani ni Tuhanta hubanta sadokah panorang Advent on, ijai ma homa talar banta hasintongan ni pangarapan ai. Dihut do Tuhanta mangurupi hita ase sirsir hita bani na manjalohon ari haluahon ai.

Tonggo: *Tarimakasih ma Bamu Tuhan, ai ihasomani Ham do hanami laho paima-imahon ari parroh-Mu in. Amen.*

HALELUYA NO. 30:5+7

5. Hosianna! Saud tarbaen,
 bagah-bagah ni Jahowa.
 'Ge ponop ope nuan,
 Hasangapon-Mu baijolma,
 Ganup na porsaya in,
 manandai gogoh-Mu in.

7. Hosianna! Anak ni
 Naibata na jadijolma.
 Tohu ma kuria in,
 ase sai tongtong martuah.
 Sangap bai goran-Mu in,
 sadokah-dokahni in.

MAGNIFIKAT

“Hagogohon do ihorjahon tangan-Ni, mambur merap do ibahen sigijang maruhur.”

Lukas 1:51

Ayat sadari on banta, ai ma sabagian humbani doding puji-pujian ni si Maria. Ai dob honsi salpu parsahapan ni si Elisabeth pakon si Maria pasal partubuh ni Sipaluah in, mintor mandoding do si Maria. Isi ni ai boi do dapot hita bani ayat 46-55. Doding on ai ma na somal igoran: Magnifikat, artini: “Ipatimbul...” Mangihutkon hata na parlobei ni doding ai (ayat 46). Tarbagi tolu do isi ni doding on, ai ma:

1. Mamuji idop ni uhur ni Naibata,
2. Mamuji hagogohon ni Naibata,
3. Mamuji hasatiaon ni Naibata dompak bangsa-Ni.

Tarmasuk hubani bagian na patoluhon in ma ayatta sadari on. Domma ididah anjaha iahapkon si Maria hagogohon ni Naibata, ai seng hape tarlanglangi atap ise pe sura-sura ni Naibata. Tuk do tangan ni Naibata manaluhon sagala munsuh-Ni. Ia do pargogoh na so tarimbang, gari sigijang maruhur boi mambur merab ibahen. Halani ai gok puji-pujian do si Maria dompak Naibata! Marhitei ai ma ipasirsir si Maria homa dirini manjalo parroh ni Kristus, Sipaluah in.

Bani panorang Advent on pe, anggo domma tongon-tongon ihaporsayai uhurta hagogohon ni Naibata, tarlobih marhitei partubuh ni Kristus, lang tarbahen lang gok puji-pujian do homa goluhta. Na porlu sonari ai ma mamareksa dirinta sandiri, atap domma dihut hita marhatongonhon hagogohan ni Naibata.

Dalanta ase das manghaporsayai hagogohon ni Naibata ai ma marhitei manjalo pakon pahusor-husorhon ibagas uhurta lanjar manghaporsayai hata ni Naibata na pinadas hubanta, usih songon si Maria na manjalo pakon manghaporsayai tonah ni Naibata na pinadas ni si Elisabeth ai.

Tonggo: *Dihut do hanami Tuhan manghaporsayai hagogohon-Mu in, ai ipaluah Ham do hanami humbani munsuhnami, marhitei na sinuruh-Mu Jesus Sipaluah hanami. Jalo Ham ma puji-pujiannami dompak Ham. Amen.*

HALELUYA NO. 27:1-2

- | | |
|---|---|
| 1. Patahar ma horbangan in,
ai domma roh Rajanta in.
Sigomgom raja haganup,
sitobus jolma haganup.
Siboan hatuahon in,
paulak hasonangan in.
In pe na puji ma
Tuhanta Naibata. | 2. Pintor tumang do uhur-Ni,
na roh hubani jolma in;
Ai Raja parhidorat do,
janah parholong atei do,
Usiron-Niin do hajojor,
na manunsahi hita on.
In pe na puji ma
Tuhanta Naibata. |
|---|---|

NAIBATA ROH HU BANTA

"Gabe daging ma Hata in, anjaha marianan i tongah-tongahta; jadi ididah hanami ma hasangapon-Ni songon hasangapon ni anak sasada humbani Bapa in, gok idop ni uhur ampa hasintongan."

Johannes 1:14

On ma sada ayat na luar biasa ibagas Bibel: "Gabe daging ma hata in." Ipatorang si Johannes do ise do Hata in, ai nini do: "Bani mungkahni domma adong Hata in, anjaha rap pakon Naibata do Hata in, anjaha Naibata do Hata in. Rap do Ia pakon Naibata bani mungkahni." (Johannes 1:1-2) Naibata do Hata in anjaha gabe dagingma Hata in. Naibata gabejolma. Songon na so porsaya diri atene? Legan do Naibata marimbangjolma. Partonduyon do Naibata seng hajolmaon. Somalni daoh do tumang Naibata, ninuhur ni jolma.

I atas ai do daoh Naibata, i parlangitan ai. Tapi ayat on patugahkon hubanta, paboa Naibata domma gabejolma, anjaha marianan bani sada panorang i tongah-tongahta. Marratus tahun paima masa halongangan banggal on, domma ipalopas Naibata juak-juak-Ni Nabi Jesaya mangidah na masa on anjaha patugahkon pasal ai, ai ma na sinuratkonna: "Tonggor ma, boratan rumah ma sada anak boru, anjaha tubuhkononna ma sada anak, anjaha bahenonna ma goran-Ni: "Immanuel" (Jesaya 7: 14)." Ibotoh hita do ia arti ni Immanuel ai ma: "Naibata rap pakon hita." Bani panorangta sonari on, Immanuel, Hata in gabe daging, ai do na margoran: Jesus Kristus. Sanggah partubuh-Ni i Betlehem, hampir ma 2.000 tahun na salpu. Ipatugah Malekat do hubani parmahan, nini: "Ulang mabiar hanima! Tonggor ma, ai ambilan malas ni uhur banggal do huboan bannima, parulihan ni ganup bangsa. Ai domma tubuh bennima saborngin on i huta ni si Daud, Sipaluah in, in ma Kristus, Tuhan in!" Ibotoh si Johannes do homa on, seng songon nipi ai, tapi kenyataan do: "Domma ididah hanami hasangapon-Ni songon hasangapon ni anak sasada na humbani Bapa in, gok idop ni uhur ampa hasintongan."

Aha do artini ai nuan banta i Indonesia on bani abad pa-20-kon on, Naibata gabejolma ibagas Jesus Kristus? Mararti do ai na boi ipestahon hita Hari Natal, sadokah ipaturut Naibata ope dong dunia on. Anjaha parsimada do homa hita bani malas ni uhur banggal, na binobanhon ni partubuh ni Kristus hu dunia on. Janah ibotoh hita ma homa, Naibatanta, na so daoh be humbanta, na mambotoh torang pasal hita, na mangarusi hita, na manramoti hita, ampa na mangkaholongi hita. Seng dong be na boi mangkaholongi hita songon pangkaholongi ni Jesus. Halani Jesus, ai ma Hata in na dob gabe daging, janah marianan i tongah-tongahta.

Tonggo: *Tarima kasih ma bamu Jesus Tuhannami, halani roh do Ham manohu hanami janah iarusi Ham do hanami, tarlobih homa halani totap do pangkaholongi-Mu bennami. Bere Ham ma bennami malas ni uhur ampa damei bani na pinestahonami pesta partubuh-Mu. Bahen Ham ma Hari Natal on mangkorhon pasu-pasu bennami. Amen.*

HALELUYA NO. 43:1-2

1. O Jesuskin hupuji Ham,
halani jadi jolma Ham;
Roh ma Ham marayak hanai on,
na sombuh i dunia on.

2. Tibal bai panggagatan in,
do Anak ni Jahowa in;
Parrupe bai dagingta on,
do na pagoluh hita on.

HOLONG NI NAIBATA PAKON BALOSTA

"Hunjon do gabe talar holong ni uhur ni Naibata banta, ai ma humbani na dob sinuruh-Ni Anak-Ni na sasada in hu dunia on, ase manggoluh hita marhiteihon-Si."

1 Johannes 4:9

Bagei do dalan laho pataridahkon pakon patandahon holong. Bapa pakon inang marsihaholongan do. Orang tua pe mangkaholongi niombahni do, sonai niombah dompak orang tuani. Na mardiha-diha sonai pakon na marhasoman pe marsihaholongan do. Holong sisonon ai ma holong na somal, ai ma na masa i tengah-tongahta pakon i tengah-tengah ni sagala jolma age pe carani palem-an.

Tapi hagianupan holongta sisonai ai lape tarparbandingkan hubani holong ni Naibata dompak hita marhitei na marsuruh Jesus Kristus hu dunia on, "Hunjon do gabe talar holong ni uhur ni Naibata banta, ai ma humbani na dob sinuruh-Ni Anak-Ni na sasada in hu dunia on." Lang ihaholongi Naibata hajolmaon marhitei holong na somal halani domma mamberontak hajolmaon dompak Naibata anjaha domma madabuh sidea hubani dousa. Ai lang be niombah ni Naibata hita, seng be homa diha-diha-Ni, sedo hasoman-Ni. Sabalikni do use ai domma gabe munsuh-Ni hita. Tapi age sonai totap do pangkaholongi ni Naibata banta. "Naibata, domma ipatalar holong ni uhur-Ni ai banta, ai ma marhitei na matei Kristus manghopkop hita, sanggah pardousa ope hita." (Rom 5:8) On ma halongangan bangga na pinestahonta bani pesta Natal on, ai age pe munsuh-Ni hita, na maningon matei ma namin, ihaholongi Tuhan Naibata do hape hita. Ipatuduhkon do holong-Ni ai hubanta marhitei parsusur-Ni bani Jesus Kristus hubanta hu dunia on. Aha do pangkorhon ni holong ni uhur ni Naibata banta? Na parlobei, halani roh do Jesus hu dunia on anjaha matei tarsilang i Golgata halani dousanta boi ma hita sonari manggoluh rap pakon Naibata sadokah ni dokahni marhitei haporsayaonta dompak Tuhan Jesus. Na paduahon domma dong holong na baru i dunia on. Ai ma holong ni Naibata na ipataridahkon homa marhitei susian ni Tuhanta. Seng tarbatas ai pitah humbani famili pakon hasoman hansa. Mardalan do ai das hubani simbalogta, seng pitah halak na dohor hubanta tapi hagianup jolma do, sagala na mangkaporluhon holong pakon pangurupionta songon na pinataridahkon ni halak Samaria paridop ni uhur ai. Termasuk do hujai na masombuh, na hona odoh-odoh, na lungunan ronsi munsuhta, halani ai do ase ihatahon Tuhan Jesus hubani na mangirikkon-Si: "Haholongi ma munsuhmu!"

Maningon do patuduhkononta holongta hubani hagianupan atap holong na somal pe ai banta atap na lang. Sonaha do boi tardalankon hita ai, ai ma marhitei na mardingat holong ni Naibata dompak hita. Ai ma jiwa ni Hari Natal on, mamestahon holong ni Naibata.

Tonggo: *Tarima kasih ma bamu Tuhan Naibata halani holong-Mu na bangga in dompak hanami, sonai homa halani boi idingat hanami holong-Mu ai marhitei Pesta Natal on. Urupi Ham ma hanami ase ulang singgan mardingat holong-Mu hansa hanami, tapi dihut mangkagoluhkon pakon mandalankon ai ganup ari. Amen.*

HALELUYA NO. 36:3-4

3. Botoh ma dear ni layak
ni Jahowa in na bayak;
Iberekon age Anak
bahen hagoluhanta in.

4. Ai talar holong atei-Ni,
jolma do ibaen huan-Ni,
masuk bai Harajaon-Ni,
hita arahon-Ni do.

GOLUH NA BARU

“Sonai pe, Titah na baru do na husuratkon bani nasiam, anjaha sintong do in ibagas Kristus ampa ibagas nasiam, ai na salpu ma hagolapan in, anjaha domma marsinalsal Panondang na sintong in.”

1 Johannes 2:8

Sada barang dagangan, idarat ituliskon “Minuman terbaik,” nomor satu minumlah demi kesehatan tubuh anda; hape dob honsi iminum gabe moyak-oyak janah maborit boltok, tontu sogam do uhurta mangidah simada pengusaha minuman ai, halani seng sesuai pardarat pakon isini. Sonai do homa age goluh ni ha-Kristenonta maningon do sesuai pardarat pakon isini use ase ulang gabe partolsuan bani halak na legan.

Marhitei na dob ijalo hita Jesus Kristus, gabe adong ma banta sada merek baru ai ma “Goluh na Baru” artini goluh ibagas Titah na baru na binobanhon ni Jesus Kristus. Ase, barang ise ibagas Kristus, na tinompa na baru ma ai. Hunjon ma hape taridah bahasa ganup jolma na manjalo Kristus ai ma na tinompa na baru pakon manggoluh ibagas goluh na baru. Titah na baru ai ma Titah na sintong ibagas Kristus ampa ibagas jolma, halani Kristus do na mamberehon Titah in janah Ia do igoki Titah ai.

Manggoluh ibagas goluh na baru ai ma taridah marhitei goluhta, na seng mardalan bani na golap. Adong hape tandani ai ma haliharon na marsinondang, lang ponop goluh na baru ai, taridah do marhitei goluhta Titah na baru ai. Marhiteihon na manggoluh ibagas goluh na baru, taridah ma lang be manggoluh ibagas hagolapan, tapi manggoluh ibagas haliharon, halani domma isondangi panondang na sintong in ai ma Tuhan Jesus Kristus. Sonaha domma manggoluh ibagas haliharon? Domma salpu goluh hagolapan ai humbanta? Kristus do panondang banta age hita na dob manggoluh ibagas Jesus Kristus gabe panondang ma, ai ma na paliharhon dalan bani hasoman jolma janah patalarhon Jesus do hagoluhan in. Halani ai pataridahkon hita ma bani goluhta paboa domma ipakei hita jolma na baru, na tinompa usih hubani Naibata, ibagas hapintoron ampa hasintongan na botul. (Epesus 4: 24)

Tonggo: *Tarima kasih ma Tuhan, bani Titah na baru na binere-Mu in bennami, bere Ham ma gogoh andohor ihagoluhkon hanami Titah-Mu in marhitei na marsihaholongan hanami, domma isondangi Ham hanami, sai andohar marhitei Titah-Mu in dihut hanami marsinalsal. Amen.*

HALELUYA NO. 38:3-4

- | | | | |
|----|---|----|---|
| 3. | Sihol haholonganku
tongtong Ham, Tuhankin
Age pusok uhurhu,
sai ganda holongkin.
Nai ma, nai ma,
sai ganda holongkin | 4. | Botul ondoshononku
Bamu ma uhurhon.
Sai holong ma atei-Mu,
urupi au tongtong!
Nai ma, nai ma,
urupi au tongtong. |
|----|---|----|---|

JESUS DO PARDAMEIAN BANTA

“Ai do pardameian banta, na pasadahon na dua ai, anjaha na parsedahon dingding bolat-bolat ai, ai ma hamunsuhon ai.”

Epesus 2:14

Bani mungkahni adong do parsahiran na orot antara jolma pakon Naibata, tapi dob honsi mardousa jolma in gabe tubuh ma parsirangan ni jolma pakon Naibata, sonai homa age parsirangan ni jolma pakon jolma.

Taridah ma tongon dousa do na mambahen jurang pemisah atap pe dingding bolat-bolat na manirang jolma pakon Naibata ronsi jolma samah jolma. Dousa tangkas taridah marhiteihon horja-horja ni daging ai ma parriah-riahon, habutakon, goluh na so marrantei, mar-Naibata na legan, hadatuon, parmusuhan, partinggihan, parsimburuon, ringis, uhur haut, subil, marpoya-poya pakon na legan. (Galatia 5: 19-21) Apostel Paulus mangkatahon marhitei ayat na i atas in, Jesus do pardameian banta, Ia do na mambahen dalam ase adong pardameianta hubani Naibata, janah Ia do manruntashon atap parsedahon dingding bolat-bolat na mambahen parmusuhan in, artini ai ibagas Jesus Kristus do boi hita marpardameian pakon Naibata, anjaha mardamei samah-samah jolma.

Buei do tongon hasadaon-hasadaon i dunia on, songon na maronjolan bani parmargaon, parsahutaon pakon na legan, tapi haganupan ai boi do gabe bolat-bolat bani halak na legan. Ibagas Jesus ipasada hita, janah hasadaon ai lang dong maronjolan hubani marga, huta, keadaan goluh siganup ari. Tapi ibagas Jesus do dapot damei na sasintongni.

Idarat ni Jesus, seng dong pardameian, lalab do hasunsahan. Idarat ni Jesus seng dong hasintongan, hagoluhan, pitah ibagas Jesus do dapot hita pardameian pakon Naibata ai ma ibagas Jesus Kristus, janah boi ma hita marsaor, marpardameian pakon Naibata ampa hubani hasoman jolma.

Sai damei na humbani Tuhan na manggoluh ibagas hadirionta.

Tonggo: *Tarima kasih Tuhan, Ham tongon pardameian bannami, ibagas Ham boi ma marpardameian hanami hubani Naibata pakon hubani hasoman jolma, sai pargogohi Ham ma hanami ase damei na hum Bamu na manggoluh ibagas hadirionnami marsada-sada. Amen.*

HALELUYA NO. 41:3

3. Sombahnami hu Bamu na dob roh on,
Ham sibohan damei hu dunia on;
Sai pasorap Ham bai uhurnami on,
Damei-Mu, o Jesus!
Hasangapon bai Naibata,
damei-damei bani jolma.
Megah uhur ni Naibata
hajolmaon use.

BASIKAH RUMAH NI NAIBATA

“Na monang in do behenonku gabe basikah ibagas rumah ni Naibatangku, seng anjai mandarat be ia hunjai.”

Pangungkabon 3:12

Hamonangan ai ma harosuh ni jolma bani goluhni, marusaha do jolma in ase monang ia. Hamonangan ai seng roh sandiri, maningon do adong parjuangan na gogoh ase dapot hamonangan ai, maningon sanggup manaluhon sagala rintangan-rintangan atap penghambat na roh hubani. Taridah ma na lang boi lang adong persiapan na matang laho manlawan sagala rintangan ase dapot hamonangan ai. Sonai do homa bani goluh ni haporsayaonta, lang roh sandiri hamonangan ai tapi maningon marusaha do hita janah maningon monang manlawan munsuhta ibagas na laho mandapotkon hamonangan hita bani goluh haporsayaonta. Nini ayat na i atas in, na monang in do bahenonku gabe basikah ibagas rumah ni Naibatangku, hunjon ma botohonta lang hape sisoya-soya goluh ni jolma na mangkabujurhon haporsayaonni.

Jolma na bujur janah totap marhaporsayaon hubani Tuhan ai ma na gabe basikah rumah ni Naibata, sonaha do ase boi monang goluhtha on? Ai ma marhitei na ijolom hita poltik hata-Ni Naibata bani goluhtha siganup ari. Rumah ni Naibata ai ma kuria banggal in, janah Ia do simada ai; ibagas sada bangunan rumah, basikah ai ma sada na porlu tumang anjaha na marpardomuan hubani batu parsuhi, halani anggo lang hot pardomuan ni batu parsuhi pakon basikah maseda ma bangunan ai. Pangkorhonni ai basikah na longkot marpardomuan hubani batu parsuhi seng sipakeion be anjaha siambungknonon mando ai.

Jesus do Batu Parsuhi, Ia do na totap janah na sintong ronsi sadokah ni dokahni. Jadi jolma na totap manjolom hata-Ni Naibata do na boi marpardomuan hubani Batu Parsuhi in ai ma Jesus Kristus. Hamonangan ibagas goluh haporsayaon ai ma siparanyakonta. Ibagas ai ise do ibahen hita hasoman laho marayak ai? Ise do ibahen hita laho mandapotkon hamonangan bani goluh ni haporsayaonta? Jesus do na totap, anjaha Ia do siparmonang. Halani ai, sai bahen hita ma Jesus gabe hasomanta laho mandapotkon hamonangan ai.

Tonggo: *Tarima kasih Tuhan, halani domma ipatugah Ham bannami ulihnami anggo monang hanami ibagas goluh haporsayaon, ai ma goluh na totap ibagas Ham. Ham Jesus sipamonang hanami, halani ai pamonang Ham ma hanami, maidop ma uhur-Mu. Amen.*

HALELUYA NO. 116:6

6. Na monang in do ningon gabe tiang.
ibagas rumah ni Naibatangkin;
I rumah in tongtong ia marian,
manjujung goran-Ni Jahowa in.
Uhirhonon-Ku hujin goran-Ku,
sijujungonni i Surga in,
sijujungonni i Surga in.

PANONDANG NI HAJOLMAON

"Ibagas Hata in do hagoluhan, anjaha hagoluhan in do panondang ni hajolmaon."

Johannes 1:4

Ibagas Jesus, Hata na dob gabe daging in do hagoluhan janah Ia do panondang ni hajolmaon. Paima gabe daging pe Hata in domma marsinondang Ia. Ia do panondang ni hajolmaon humbani mungkahni das hubani panorang ujungni. Domma marsinondang Ia age bani panorang ni si Abraham, si Musa, nabi-nabi pe janah marsinondang do age hubanta ronsi hubani na so mananda-Si ope. Marsinondang do Jesus marhitei Hata-Ni, marhitei pambahenan-Ni pakon marhitei sitaronon-Ni pe.

Na sinondangan ni Jesus ai do na dapotan hagoluhan na sadokah ni dokahni, pakon na boi marmalas ni uhur age sanggah goluh parsatongkinan on pe. Seng ra mintor sondang ni Tuhanta age sadihari pe. Lobih hubani sondang ni mata ni ari do sondang-Ni, ai hagoluhan sisadokah ni dokahni do homa isini.

Sagala na dob manjalo sondang na humbani Tuhanta, ai do homa na dihut marsinondang, padashon haliharon na humbani Jesus, ai dihut do hita iangkat Tuhanta gabe panondang ni dunia on! Artini dihut do hita isuruh Tuhanta padashon pakon manawarkon hagoluhan na humbani Jesus Kristus hubani hasoman na legan pe. Tontu seng tarpadas hita haliharon ai anggo hita pe lape manjalo panondang na sintong in. Halani ai jalo hita ma panondang ni hajolmaon in.

Tonggo: *Ham Panondang ni hajolmaon, sondangkon Ham ma haliharon bennami ase boi hanami manggoluh ibagas malas ni uhur anjaha manjalo hagoluhan sisadokah ni dokahni homa. Pargogohi Ham ma hanami ase margogoh hanami gabe "panondang ni dunia" on. Amen.*

HALELUYA NO. 456:1-2

- | | |
|---|--|
| 1. Siang do sinalsal ni
Panondang in,
Kristus do Panondang.
Ganup isondangi,
ai ipasada do hita tongtong. | 2. "Ge buei pe
ranting ni hayu in,
Jesus do bonani.
Hita do ranting-Ni,
ai ipasada do hita tongtong. |
|---|--|

PANORANG NI NAIBATA

"Ai saribu tahun bani pangidah-Mu doshon ari nantuari na dob salpu do ai, songon sada horin borngin-borngin."

Psalmen 90:4

Domma boi bilanganta atap na piga jam nari ase salpu tahun on humbanta, podas do marlopusan ari-ari ni goluhta. Marbatas do homa panorangta i dunia on. Lang na ahapkon domma hape bahat na marsalpuan. Porini ibere Tuhanta pe goluhta das hubani saribu tahun, anggo ilobei ni Tuhanta doshon na sadari na dob salpu ope ai, gariada nansai pe lang das, ai doshon sada horin borngin-borngin do ai, artini; sadari pe lang gok. Hape banta domma doshon dua puluh sundut jolma ai!

Hunjai taridah na podas salpu do ari-arinta, tapi totap ronsi sadokah ni dokahni do anggo panorang ni Tuhan Naibata. Seng pitah patugahkon hatongtongan ni Tuhanta ayat on banta tapi dihut do patugahkon paboa Naibata do hansa na boi haporusanta marsundut-sundut. Age pe salpu na salpu in, marubah-ubah keadaan pakon situasi, totap do anggo Tuhanta ronsi sadokah ni dokahni. Ia do Tuhan ni sagala jaman, na manrajai sagala panorang age pe marubah-ubah isi ni panorang in.

Sagala panorang na binontasta, ai ma panorang ni Naibata, halani ai patut martarimakasih hita bani Tuhanta janah pargunahononta ai sadear-dearni, anjaha pos do uhurta iparuhuri Tuhanta do hita mamilangi ari-ari na binere ni Tuhanta hubanta, ase dapotan uhur na pantas hita.

Tonggo: *Age pondok tumang do panorang nami martimbangkon panorang-Mu Tuhan, tapi gok do pasu-pasu na boi jumpah hanami ibagas ai. Tarima kasih ma hatahonon nami Bamu Bapa, halani ibere Ham do panorang on bennami, na boi pakeion nami pasangapkon Ham. Amen.*

HALELUYA NO. 183:1-2

- | | |
|---|--|
| <p>1. Ari na so maringgan in
sai songon longgur sora ni
alolingmin hubangku.
Songon tiniham uhurhin
bai podang na dob marot in
huja ma ahu laho?
Sai hitir-hitir uhurhin
anggo hupingkir parrohmin.</p> | <p>2. Ai hadorsaon tanoh on,
sai salpu use do tongon
bai ujung ni ganupan.
Anggo na roh magira in,
na dong be salpu anggo in
sadokah ni dokahni.
Na dong maluah be hunjin,
na lao hu hamagouan in.</p> |
|---|--|

NA SO RA SALPU

“Langit ampa tanoh salpu do, tapi anggo hatang-Kai seng be anjai salpu.”

Lukas 21:33

Lang pala mahol banta laho mangindahi pakon patuduhkon na ra salpu, halani domma bahat tumang na dob salpu. Bani goluhta sandiri gelah na pareksa urah do dapot hita ai janah deba domma na bontas. Ibagas tahun on ma deba humbanta na salpu masa haposoonni halani tahun on ia mambuat boru. Na deba ibagas tahun on ma salpu parlaranni parsikolahan, halani domma tamat ia hunjai. Dong homa na salpu masa jabatanni halani pensiun ma pakon bahat na legan ope na so tarpajojo hita sada-sada.

Tapi sedo pitah ai na ra salpu, gari langit ampa tanoh pe salpu do, samintolah ma na marpardomuan bani goluhta on! Age pe marsalpuan haganupan ai tarmasuk ma ari-ari ni goluhta on. Dong ope na so ra salpu, ai ma hata ni Naibata! Humbani sejarah kuria tumang gelah na pareksa domma taridah hasintongan ai, iusahahon halak do bani piga-piga ianan ase bois namin hata ni Naibata na tarsurat ibagas buku Bibel in, pala iparentahkon piga-piga Kesar Rom ijia ase itutung haganup sagala buku Bibel, tapi hataridahanni pakon dob ni lambin martambah do. Sondahan on lobih ma use humbani 1500 bahasa ialimhon buku Bibel, janah buku Bibel ma buku sibahatan tarjual ganup tahun i dunia on!

Patut do tongon igoran hata ni Naibata, hata hagoluhan! Janah na manjalo hata in pakon na mangkaporsayaisi pe homa seng salpu ronsi sadokah ni dokahni tapi dapotan hagoluhan na so ra salpu ai do homa. Bani ujung ni tahun on patut martarimakasih hita bani Tuhanta halani ibere ope Hatani ai hubanta na gabe hagoluhan, na mambahen dihut hita homa manjalo hagoluhan na so ra salpu simagira ai.

Tonggo: *Tarima kasih ma bamu Tuhan, halani ibere Ham ope Hata-Mu in bennami. Age pe salpu langit pakon tanoh on, totap do Hata-Mu anjaha boi homa na porsaya bani Hata-Mu totap ronsi sadokah ni dokahni, age pe ibontas hanami lobei na ra salpu in. Amen.*

HALELUYA NO. 209: 3+6

- | | |
|---|--|
| 3. Patotap Ham ma Hata-Mu,
na mangapohi uhurhon;
Tapi pangagou haganup,
padaoh Ham ma in tongtong. | 6. Sai togu Ham ma hanami on
hu hagoluhan na tongtong.
Totap bai kuria-Mu in,
rupeini na tarsulur in. |
|---|--|